



9. februar 2018

Inatsisartut Suleriaasianni § 37 imm. 1 naapertorlugu Naalackersuisunut apeqqut imaattoq matumuuna saqqummiuppara.

Naalackersuisunut apeqqutit:

1. RG-p nunatta avataani allaffissornikkut qullersaqarfia qassinik sulisoqarpa?
2. RG-p nunatta avataani allaffissornikkut qullersaqarfiani sulisut nunatta avataani qanoq annertutigisumik namminneq nunagisaminnut / najugaqarfimminnut ukiumut katillugit akileraartarpat?
3. RG-p nunatta avataani allaffissornikkut qullersaqarfiani sulisut ilai imaluunniit tamaasa nunatsinnut nuunneqarsinnaaneranik pilersaaruteqartoqarnerluni?
4. Uummannap sulluani ukioq manna tunisassiorfiit marluk unipput taakkulu aamma peqqumaasivii / qerititsivii atorunnaarput, tunisassiorfiit sinnerinut eqiterunneq sunniuteqarnerlussagatinneqarnerluni?
5. Uummannap sulluani peqqumaasiveqarnikkut / qerititsiveqarnikkut annertusaasinnaanernik takorluuisoqarnerluni?
 - a. taamaassimappat suni inoqarfinni takorluuisoqarpa?
6. Uummannap sullua eqqarsaatigissagaanni maanna ukiumut qalerallit assat agguanneqarsimalerput, annikinnerusumik imaluunniit annertunerusumik killilersuisoqarnerluni ? taamaattoqarsimassanngippat:
 - a. Ullormut qalerallit Uummannami qanoq annertutigisut tiguneqarlutillu tunisassiarineqarsinnaappat?
 - b. Ullormut qalerallit Uummannami tunisassiorfiup tigusinnaasai aalisartut qassit missaasa tunisineranik aallaaveqartarpat?
 - c. taamatuttaarlu aalisartut suli qassit ullormut tunisisinnaagaluarpat?
 - d. taakkulu tunisisinnaanngitsut ullormut allamut tunisisussanngortinneqartarnerlutik?
7. RG-p tunisassiorfia Kangaamiuni peqqumaasiveqarnikkut qerititsiveqarnikkut inerisarneqarnissaanik takorluuisoqarnerluni?
 - a. taamaassimappat tamanna qaqugu naatsorsuutigineqarpa?
8. RG-miit ukioq 2017 inoqarfinni suni umiatsianik soorlu POCA 600 aquuteralleriikkanik aammalu atortorissaarusersukkanik aalisartunut ikaarsaartitsisoqarpa?
9. RG-mi nalittorsaanermit nunatsinnilu tamakkiinerusumik tunisassiarisarnissaanut pilersaarusiortoqarnerluni?
 - a. taakkualu suuppat?
10. Nipisaat / arnarluit suaanik tamakkiinerusumik nalittorsaasoqarnissamik suliniuteqartoqarnerluni?

(Inatsisartuni ilaasortaq Villy Olsvig, Inuit Ataqatigiit)

Tungavilersuutit:

Nunatsinni assakaasumik kaaviaartitsisup pingaarnersaa tassaavoq aalisarneq, tassanilu qitiulluinnartunut ilaavoq Royal Greenland A/S.

Taamaattumillu nunatta namminiilernissamik aallaaveqarluni ingerlanermini pissusissamisoorluinnassagaluarpoq pisortat pigisaata aamma nunatsinni aallaaveqarluni qullersaqarfiata allaffissornikkut angerlarsimaffeqarnissaa, imaassinnaanngilarmi suliffeqarfiup taamaallaat sinneqartoorutaaniit akileraartinneqartarnera naammagineqassasoq. Qullersaqarfik naatsorsuutigigakku allaffissornikkut arlalissuarnik sulisoqarsinnaanissaa, taakkulu nunatsinnut nuunneqarnerata kingunerisaanik inoqarfimmi aningaasarsiornikkut kaaviartitsinermi minnerunngitsumillu inoqarfimmi akileraartarnikkut annertuumik sunniuteqarsinnaassagaluarpat.

Qulaani taaneqartut saniatigut inuusuttorpassuit aalisartunngorusussinnaasut aamma RG atorluartarunarmassut, tassanilu umiatsianik aquutralannik aammalumi atortorissaarusersuinermi, tamatuma qanoq atorluartigineqarnera paasisaqarfigissallugu pingaaruteqarsorinarmat.

Taamatuttaarlu nunatsinneersut tunisassiaasinnaasut nalitusarsinnaanerinit tunngasut, tassani assersuutigineqarsinnaalluarput nipisaat/arnarluit suaat aalisartumiit pisiarineqarnermini kiilumut 17 kr. missaaniittartut piffiillu ilaanni akisunerusinnaasartut, nunattalu avataani nalitusarneqariarlutik pisiniarfinni pisiarineqarsinnaasarlutik 80 gram á 30 kr. missarluinnaani, tamakku nunatsinni suliarineqarsinnaanerinit pilersaarusiortoqarnerasoq paasisaqarfigerusunnartunut ilaalluinnarsorinarmat.

Ullut qulit qaangiutsinnagit akineqarnissara kissaatigaara.